



*Isaac est chassé par Abimelech à cause de sa grande prospérité: mais par apres l'alliance est accordée entr'eux.*

**A**BIMELECH voyant qu'Isaac multiplioit en puissance, en richesses, & en grande famille, luy dit: Departst-toy de nous, car ta puissance nous surmonte. Isaac donc se départit, & tira vers le torrent de Gerar, & habita là, y faisant creuser plusieurs puits, dont aduint debat entre les pasteurs de Gerar, & ceux d'Isaac, pour lequel éviter il fit creuser d'autres puits: mais enfin, il monta en Bersabée, où le Seigneur s'apparut à luy, disant: Je suis le Seigneur Dieu d'Abraham ton pere, ne crains point: car je beniray, & multiplieray ta semence, à cause d'Abraham mon seruiteur. Adonc Isaac édifia vn Autel, & inuoqua le nom du Seigneur. Or Abimelech accompagné d'Ochosath son amy, & Phicol Prince de son armée, vinrent deuers Isaac, pour auoir alliance avec luy, lequel leur dit: Pourquoi m'avez-vous à tort de jetté arriere de vous? Abimelech luy dit, Qu'en paix il l'auoit laissé aller sans luy auoir fait aucun mal, & que voyant qu'il estoit beny de Dieu, ils desiroient traiter par serment alliance avec luy: Isaac accepta cette condition. Adonc il leur fit vn grand banquet, & mangerent & beurent entr'eux, en signe d'amitié. Puis au matin jurerent l'vn à l'autre: apres Isaac les laissa aller paisiblement chez eux.

*Genese 26. Chap.*